

Monica Kock, como Presidente di Fundacion Monumento Juancho Irausquin

Juancho Irausquin politico cu vision y curazon

ORANJESTAD (AAN): Awe, 20 di juni, ta recorda fecha di fayecimiento di e gran politico Juan E. (Juancho) Irausquin.

Un dia den historia cu tabata un pagina scur pasobra e politico Juancho cu tabata hopi stima a bay laga su pueblo. E ta keda na nos pa recorda tur locual el a haci pa nos pais y pueblo. Pa aprecia su sacrificionan y su determinacion pa traha pa un Aruba prospero cu un pueblo feliz.

VISION. Juancho Irausquin tabata un pionero. Juancho a pone e fundeshi di nos economia y a laga un plan pa termino largo atras. Un economia cu a pone Aruba crece y bira mundialmente conoci pa su beachnan blanco pero mas importante pa e cordialidad di su hendenan. Un pais cu tabata florese na unda su pueblo tabata feliz. door di e vision di Juancho Irausquin nos pais a haya un economia fuerte pa nos por para riba nos mesun pia. Juancho Irausquin ta conoci pa ta e tata di turismo. Un persona cu vision cu a traha pa logra loke e kier pa su pais aunke hopi hende no tabata kere den esei.

E momento cu Juancho Irausquin a tuma e prome pasonan pa nos Industria di Turismo, su preocupacion tabata pa e trahadornan. Lago tabata layoff hende y su deseo tabata pa segura trabao pa e trahadornan door di tin un otro pilar di economia. Na e momento ei na aña 1950 el

a sigura trabao pa trahador. Pero tambe despues di su fayecimiento su vision y siguranza a salbuardia Aruba ora Lago a sera. Su vision pa wak pa mayan y pa e futuro di Aruba a pone cu nos a logra di pasa den e tempo duro ora Lago a sera. Ora Juancho Irausquin a dreña den gobierno na aña 1954 el a cuminsa mesora cu su planan pa traha un hotel, amplia WEB etc. Trahando duro, oras largo pa desaroya Aruba e momento ei.

Pero Juancho Irausquin tabata un persona cu tabata wak pa e futuro tambe. Hunto cu su coleganan e a traha un plan di 10 aña. Un plan pa sigui desaroya Aruba y garantisa e economia y turismo di Aruba. E plan tabata riba 11 tereno y a costa 222 million Florin. E plan complete a worde entrega na februari 1962. Lastima cu e tempo no a dura hopi ya cu el a fayace 20 di juni 1962. Pero toch Aruba a logra di haya e frutonan di e vision di Juancho Irausquin cu e a laga un plan di trabao pa 10 aña atras.

Su logronan grandi a trece cu ne cu su partido P.P.A. a logra di haya $\frac{3}{4}$ parti di e voto nan nos pueblo. Un sosten di pueblo masal cu ningun otro partido por a logra te awe. Un logro politico masha grandi mes. Pero den historia Juancho Irausquin no ta worde recorda pa e logro di tin mayoria absoluto aki. Juancho Irausquin ta worde recorda pa su vision y sabiduria pa tin un paiz

financiero stabil.

CURAZON. Pero mas ainda den pueblo Juancho Irausquin ta worde recorda pa ta un persona cu un curazon grandi cu nunca e a lubida e pueblo y e personanan di menos recurso. Ta hopi ta esunan cu Juancho a yuda personalmente den e bida relativamente cortico cu e tabatin. Pero mas ainda el a percura pa tin e leyman pa proteha e personan di menos recurso y garantisa un bida digno y husto. *E la percura pa e ley di pensioen di behez cual ta duna y garantisa e grandinan un entrada ora nan a yega e momento cu nan no por a traha mas pa tin un entrada. *E la percura pa ley di vuida y huerfanonan pa garantisa un entrada na momento duro ora e casa/tata ta fayace. *El a percura pa e prome cas nan di pueblo. *Ley ariba e CAO pa derecho di trahador. *Juancho a percura cu school ta liber y cu tin beca pa tur mucha por haya e oportunidad pa studia. Pa Juancho Irausquin no tabatin destincion den hende. el a traha pa tur. Juancho Irausquin tabata desea pa tur persona tin e mesun oportunidad den bida. Te awe nos ta disfruta di e proteccion, seguransa y oportunidad cu el a duna pa cada un di nos, (vuida, huerfano, trahador, hende grandi y mucha) por tin un bida digno y bay dilanti. Igualdad, oportunidad y dignidad pa e ser humano sin destincion tabata e idealnan

di Juancho Irausquin. Un persona cu vision, inspiracion, dedicacion incansable pero pa tur esun cu conoce un persona cu curazon grandi. Su bida como ser humano, e vision, e logronan y e plan cu

e a laga atras pa Aruba ta impresionante. Pero den nos curazon y den pueblo e lo worde recorda pa su amor pa e ser humano pa tin un bida digno. Pesey Juancho ta e Sirbidor di Pueblo.